

ANOU APRANN NURSERY RHYMES DILO DIBOUT

1

A ti enn alwa;
B ti bat li,
Ch ti chombo li,
D ti dres li,
E ti efil li,
F ti fagot li,
G ti glas li,
I ti izol li,
J ti jam li,
K ti kraz li,
L ti lev li,
M ti melanz li,
N ti nenenn li,
O ti oper li,
Ou ti ouver li,
P ti ploy li,
R ti roul li,
S ti sikre li,
T ti tranp li,
V, W ti vann li,
X, Y, Z ek tou lezot
Ti'le manze san kas kot.

2

A ti enn azan ki kwar li minis,
B ti enn bourik ki kouver ar pis.
CH ti'enn cholo nek pans mastana,
D ti enn deler ki zaza-zaza.
E ti epe me enn mari lare,
F ti'enn faner ki roul larou kare.
G ti enn grannwar ki ti deklar bay,
I ti enn idio ki pa konn travay.
J ti enn joukal ki kwar li zeni,
K ti enn katar kwar li favori.
L ti enn lasos ki may dan lak brit,
M ti enn malang zame rant dan bit.
N ti enn nwizans ki nek konn detrir,
O ti enn oter ki pa konn ekrir.
P ti enn gro piaw ki deklar gourrou,
R ti roder bout kouma trouloulou.
S ti enn souser kontan pas siro,
T ti enn teter ki deklar zoro.
V ti enn voler ki deklar monper,
W weyter deklar manejer.
Y ti yoyo san so lafisel,
Z ti enn zozo imit larkansiel.

3

Komie zour reste pou mo baba zwe?

Samdi, Dimans, Lendi,

Mardi, Merkredi, Zedi, Vandredi,

Samdi, Dimans, Lendi.

Sote, galoupe, baba kontan zwe.

Baba kontan zwe Mardi, Merkredi, Zedi, Vandredi,

Samdi, Dimans, Lendi, Mardi, Merkredi, Zedi, Vandredi...

4

Mo premie trwa-kar lakrwa – T;

Mo segon enn triyang lor de lipie – A;

Mo trwaziem de demi-serk kole ar perpendikiler – B;

Mo dernie enn triyang lor de lipie – A.

Mo tou: pwazon ki dimoun kontan: TABA.

5

Misie Les met lafaya;

Misie Lenor donn farata;

Misie Lwes prepar enn bon kous;

Misie Lesid bril so labous

Ar alouda ek dal pita.

6

Avan li ale, papa ti donn mwa

Enn bol, enn boutey, enn latab,

De bol, de boutey, de latab,

Trwa bol, trwa boutey, trwa latab,

Kat bol, kat boutey, kat latab,

Senk bol, senk boutey, senk latab,

Sis bol, sis boutey, sis latab,

Set bol, set boutey, set latab,

Wit bol, wit boutey, wit latab,

Nef bol, nef boutey, nef latab,

Dis bol, dis boutey, dis latab...

7

Zanfan Lendi kontanple;

Zanfan Mardi gazouye;

Zanfan Merkredi sante;

Zanfan Zedi etidie;

Zanfan Vandredi danse;

Zanfan Samdi amize;

Zanfan Dimans medite;

Tou zanfan lemonn antie

Fer later-lesiel riye.

8

Dis ti grengale ti manz kari bef;
Enn ladan trangle, lerala ti res nef.

Nef ti grengale ti rant dan enn pit;
Enn ladan tase, lerala ti res wit.

Wit ti grengale ti lapes sevret;
Enn ladan tom sek, lerala ti res set.

Set ti grengale mont lor katrepis;
Enn ladan tonbe, lerala ti res sis.

Sis ti grengale ti rant dan enn tenk;
Enn ladan nwaye, lerala ti res senk.

Senk ti grengale galoup deryer sat;
Enn ladan plane, lerala ti res kat.

Kat ti grengale rod al kot lerwa;
Enn ladan krake, lerala ti res trwa.

Trwa ti grengale rant dan enn lede;
Enn ladan toufe, lerala ti res de.

De ti grengale ti pe fer zot senn;
Enn ladan kite, lerala ti res enn.

Enn ti grengale ti pe gagn li bonn;
Me ler li marye pa ti res personn.

9

Enn, de,
Met soulie;
Trwa, kat,
Tir savat;
Senk, sis,
Manz sosis;
Set, wit,
Rant dan bit;
Nef, dis,
Pa rod pis;
Onz, douz,
Disik rouz;
Trez, katorz,
Tranp lagorz;
Kenz, sez,
Siz lor sez;
Diset, dizwit,
Katorz ventwit;
Diznef, ven,
Bwar diven.

10

Ena trant zour dan Septam,
Dan Avril, Zen ek Novam;
Lezot ena trante-enn.
Zis Fevriye fer so senn:
Trwa kou ventwit, enn kou ventnef.

11

Salomon Grandi
Ti ne enn Lendi,
Batize Mardi,
Marye Merkredi,
Tom malad Zedi,
Pa bon Vandredi,
Desede Samdi,
Dimans samadhi.
Zistwar fini.

12

Gran A ti soke ar manier gran B
Parski C, D, E, F pe fann ar G;
Hash anvi marye; I, J, K, L 'si;
M zwe mis lekol, devlop zot lespri.
A, B, C, D, E, F, G, H, I, J, K, L, M, N,
O, P, Q, R, S, T, U, V, W, X, Y, Z.